

经文20

〔七句义〕（三）「行所住处」中〔十六〕求教授
依离障碍十二种中，为离无教授故

经言「须菩提！于意云何？如来于然灯佛所有法得阿耨多罗三藐三菩提不？」
如是等

经言「须菩提！若有法如来得阿耨多罗三藐三菩提者，然灯佛则不与我授记，汝于来世当得作佛」等

此有何意？

若菩提法可说，如彼然灯如来所说者，我于彼时便得菩提，然灯如来则不授记言我得等
以彼法不可说故。我于彼时不得菩提，是故与我授记

何故彼法不可说？

经言「须菩提！言如来者，即实真如」故

如清净故名为如来，以如不可说故作此说。
清净如名为真如，犹如真金

或言：然灯如来所于法不得菩提，世尊后时自得菩提，为离此取故

经言「须菩提！若有人言，如来得阿耨多罗三藐三菩提者，是人不实语」等

经言「须菩提！如来所得阿耨多罗三藐三菩提，于是中不实不妄语」者

显示真如无二故

云何不实？谓言说故
「不妄」者，谓彼菩提不无世间言说故

经言「是故如来说一切法皆是佛法」者

此何义？

显一切法法如清净故

彼一切法法体不成就，为安立第一义故

经言「须菩提！所言一切法一切法」者，即非一切法是名一切法故